

共同經課 - 1 使徒行傳十六章十六節~三十四節

16 後來阮去祈禱 ê 所在，有一個女婢 tú-tiòh 阮，伊 hō 卜卦 ê 神上身；平素用卜卦 hō hiah-ê 主人大 thàn 錢。17 伊 tè 保羅 kap 阮，叫講，Chiah-ê 人就是至高上帝 ê 奴僕，用拯救 ê 路傳 hō lín。18 伊 choē-choē 日 án-ni 行。保羅真厭恨，oát-tng 身 kā hit-ê 神講，我託耶穌基督 ê 名，命令你對伊出去。神即時出去。19 伊 hiah-ê 主人看見 thàn 錢 ê òng 望已經失落，就掠保羅、Se-lah，拖 in 入街市，去見有司官，koh 解送到上司官講，20 Chiah-ê 人是猶太人，大攪擾咱 ê 城，21 傳咱羅馬人所 òm 應該守，òm 應該行 ê 規例。22 眾人 kui 群起來攻擊 in；上司官 pak in ê 衫，命令用棍 phah in。23 Phah 真 choē 下，就關 in 落監，吩咐顧監 ê 嚴謹顧守；24 顧監 ê 受 chit 號命令，就關 in 落內重監，kông in ê 腳 tī 柴 kông 裡。25 但是半暝保羅、Se-lah 祈禱吟詩，o-ló 上帝；26 關 tī 監裡 ê 人也注意 teh 聽；忽然地大動，致到監 ê 地基 lóng 搖動；chiah-ê 門也 liâm-pin lóng 開；眾人 ê 刑具一盡 lak。27 顧監 ê 人醒，看見監門開，phah 算監囚 lóng 已經逃走，就拔刀，beh 家己 thài。28 但是保羅大聲叫，講，莫得家己相害；阮 lóng tī chia。29 顧監 ê 人叫人 kiáh 火來，跳入去，ngiauh-ngiauh-chhoah 仆 tī 保羅、Se-lah ê 面前，chhoā in 出來，講，30 先生 ah，我 tiòh 怎樣做，chiah 會得 tiòh 救？31 應講，Tiòh 信主耶穌，你就得 tiòh 救，以及你 ê 家。32 就用主 ê 道理講 hō伊 kap 伊家內 lóng 總 ê 人聽。33 Tī hit 暝 hit 時，顧監 ê 人 chhoā in 去洗 in ê 傷；伊 kap 全家 ê 人即時 lóng 受洗禮。34 Chhoā in 上伊 ê 厝，備辦 hō in 食；已經信上帝，就 kap thong 家大歡喜。

共同經課 - 2 詩篇九十七篇

1 耶和華做王；地 tiòh 快樂；眾海嶼 tiòh 歡喜。2 密雲 kap 烏暗 tī 伊 ê 四圍；義理 kap 公平是伊寶座 ê 地基。3 火行 tī 伊 ê 面前，燒伊四圍 ê 對敵。4 伊 ê sih-nà 照光世界；地看見，就振動。5 Tī 耶和華 ê 面前，就是全地 ê 主 ê 面前，Chiah-ê 山消熔親像蠟。6 Chiah-ê 天顯明伊 ê 義，列邦看見伊 ê 榮光。7 凡若服事(sài)雕刻 ê 偶像，用虛假 ê 神自誇 ê，lóng tiòh 受見笑；Lín chiah-ê 神 ah，lóng tiòh 敬拜伊；8 耶和華 ah，因為你 ê 判斷，錫安聽見就歡喜，猶大 ê 城亦 lóng 快樂。9 因為耶和華你是至高 poān 過全地；你是 chì-chun，poān 過眾神明。10 疼耶和華 ê 人，lín lóng tiòh 怨恨 pháiⁿ；伊保護伊聖 ê 百姓 ê 性命；伊拯救 in 脫離 pháiⁿ 人 ê 手。11 光明是為 tiòh 義人來備辦，歡喜是為 tiòh 心正直 ê 人來備辦。12 義人 ah，lín tiòh 因為耶和華來歡喜；記念伊 ê 聖名來 o-ló。

共同經課 - 3 啟示錄二十二章十二節~十四節，十六節~十七節，二十節~二十一節

12 我緊緊到；報應在 tī 我，beh 照 tàk 人 ê 所做來報伊。13 我是 A-lī-hoat koh 是 O-bí-ka，是頭一個，是路尾 ê，是起頭，是 soah 尾。14 洗清 in ê 三個人有福氣，beh hō in 有權 tī 活命 ê 樹，koh tùi chiah-ê 門入城。16 我耶穌已經差我 ê 天使為 tiòh chiah-ê 教會，對 lín 證明 chiah-ê 事。我是大衛 ê 根頭，koh 是伊 ê 後裔，是光光 ê 啓明星。17 聖神 kap 新娘 lóng 講，來。聽見 ê 人 tiòh 講，來。嘴乾 ê 人 tiòh 來。意愛 ê 人 thang 白白得 tiòh 活命 ê 水。20 干證 chiah-ê 事 ê 講，Tiòh，我緊緊到。À-bēng；主耶穌 ah，你 tiòh 來。21 願主耶穌 ê 恩典 kap 眾聖徒 saⁿ-kap tī-teh。À-bēng。

共同經課 - 4 約翰福音十七章二十節~二十六節

20 我 m-nā 為 tiòh chiah-ê 人求，亦為 tiòh 對 in ê 話來信我 ê 人求；21 hō in lóng 做一個；親像父，你 tiàm-tī 我，我 tiàm-tī 你，hō in 亦 án-ni tiàm-tī 咱；就 hō 世間信你差我。22 你所 hō 我 ê 榮光，我已經 hō in；hō in 做一個，親像咱 ê 做一個；23 我 tiàm-tī in，你 tiàm-tī 我，hō in 能完全來做一個；hō 世間知你差我，亦知你疼 in 親像疼我一樣。24 父 ah，你所 hō 我 ê，我 ài in tī 我所 tī-teh ê 所在，亦 kap 我 saⁿ-kap tī hia；hō in 看見你所賞賜我 ê 榮光；因為創造世間以前你已經疼我。25 義 ê 父 ah，世間 bē bat 你；獨獨我有 bat 你；chiah-ê 人亦 bat 你有差我；26 我 bat 用你 ê 名指示 in，koh beh 指示 in；hō 你疼我 ê 疼痛 tiàm-tī in，我亦 tiàm-tī in。